

III.

ALEXANDRIÆ
ÆGYPTI ME-
TROPOLIS DE-
SCRIPTIO.
f Marc. lib. 22.

Alexandriam Metropolim totius Ægypti diximus ex Notitia antiqua; hæc autem apud Marcellinum^a, vertex omnium est civitatum, quam multa nobilitant, & magnificentia conditoris altissimi, & architecti solertia Dinocratis: qui cum ampla mœnia fundaret & pulchra, penuria calcis ad momentum parum repertæ, omnes ambitus lineales farina resperfit: quod civitatem posthæc alimentorum uberi copia circumfluere fortuito monstravit indicio. Inibi auræ salubriter spirantes, aër tranquillus & clemens: atque, ut periculum docuit, per varias collectum ætates, nullo penè die incolentes hanc civitatem solem serenum non vident. His accedunt altis sufflata fastigiis templa, inter quæ eminet Serapium, quod licet minuatur exilitate verborum, atriis tamen columnariis amplissimis, & spirantibus signorum figmentis, & reliqua operum multitudine ita est exornatum, ut post Capitolium, quo se venerabilis Roma in æternum attollit, nihil orbis terrarum ambitiosius cernat. In quo Bibliothecæ fuerunt inæstimabiles: & loquitur monumentorum veterum concinens fides, septingenta voluminum millia, Ptolemæis Regibus vigiliis intentis composita bello Alexandrino, dum diripitur civitas sub Dictatore Cæsare conflagraffe. Nequidem nunc in eadem urbe doctrinæ variæ silent: nam & disciplinarum magistri quodammodo spirant, & nudatur ibi geometrico radio quicquid reconditum latet, nondumque apud eos exaruit musica, nec harmonia conticuit, & recalet apud quosdam adhuc licet atros consideratio mundani motus & siderum, doctique sunt haud numero pauci. Super his scientiam callent, quæ fatorum vias ostendit: Medicinæ autem, cujus in hac vita nostra nec parca nec sobria desiderantur adminicula crebra, ita studia augentur in dies, ut licet opus ipsum redoleat, pro omni tamen experimento sufficiat medico ad commendandam artis auctoritatem, si Alexandriæ se dixerit eruditum. Hujus primùm incolæ longe ante alios, ad varia religionum incunabula (ut dicitur) pervenerunt, & initia prima sacrorum cautè tuentur condita scribis arcanis. Hac institutus prudentia Pythagoras colens secretius Deos, quicquid dixit aut voluit, auctoritatem esse instituit ratam, & femur suum aureum apud Olympiam sæpe monstrabat, & cum aquila colloquens subinde visebatur. Hinc Anaxagoras lapides è Cælo lapsuros, & putealem limum contrectans, tremores futuros prædixerat terræ. Et Solon sententiis adjutus Ægypti Sacerdotum, latis justo moderamine legibus, Romano quoque juri maximum addidit firmamentum. Ex his fontibus per sublimia gradiens sermonum amplitudine Jovis æmulus non visa Ægypto militavit sapientia gloriosa.

IV.

ALEXANDRIA
SEDES PRÆ-
FECTI & PATRIARCHÆ.

In hac illustri civitate sedebat Præfectus Augustalis, quem Augustus Ægyptum sibi reservans, huic universæ præesse voluit. Ejus munus & auctoritas describuntur in Codice, Titulo de Officio Præfecti Augustalis, eique singuli, singularum Provinciarum Ægypti Præsides parebant, inter quos nullus erat Consularis, Imperatoribus haud conveniens judicantibus, ut Consulares Augustali Præfecto, qui ex ordine Equestri semper erat, pareret. Vicarii munereungebatur, licet nomine diverso, majorique splendore, adeo ut penè omnia honoris insignia, quæ Orientis Præfecto concessa erant, ipse etiam haberet, paucis exceptis.

Sedebat & in ea Patriarcha totius Ægypti, ut à Civilibus ad Ecclesiastica transeamus, isque Alexandrinus ex hoc dicebatur, quod esset Episcopus Alexandriæ, quam hoc nomine cum regione vicina in spiritualibus regebat, sicut Ægyptum primam ut Metropolita, & universam Ægyptum lata significatione sumptam, ut Patriarcha. Id autem muneris tanto cum splendore talique cum potentia obibat, ut per eum, inquit Socrates^a, nonnihil de autoritate eorum, qui ab Imperatore ad Magistratus gerendos designati erant, detractum esset. Imò & Civilem dignitatem Ecclesiasticæ addidit Cyrillus, cum hujus regionis Patriarcha factus est, ut legitur apud eundem So-

^a Socrat. lib. 7. hist. Eccles. cap. 13. Ορέσσης καὶ πρότερον μὲν ἐμίσει τὴν δυναστείαν τῶν ἐπισκόπων, ὅτι παρενόητο, πολὺ τῆς ἐξουσίας τῶν ἐν βασιλείᾳ ἄρχων τεταγμένων.